



Aruba Softball Bond cu un logro significativo

A firma un acuerdo di trabao y desaroyo cu Presidente di softball di Canada Kevin Quin



ORANJESTAD (AAN)--- Recientemente durante e weekend di carnaval presidente di ASB, Sr. Endy Croes a atende un workshop di ISF na San Francisco cual a wordo guía pa un compañía profesional LBB Strategies di Canada construyendo un Long Term Strategic Plan pa ISF riba plataforma mundial.

Presidentenan di diferente país a wordo eligi pa un comision pa atende e sesion aki cual por cierto tabata un sesion hopi interesante cu a tuma lugar 3 dia tras di otro averahe 10 ora pa dia. Riba esaki nos lo amplia den dianan nos dilanti.

Durante e workshop aki a haya e oportunidad di reuni cu diferente presidentenan di paisnan grandi y bon estructura den desaroyo di deporte di softball. Endy Croes representando Aruba a logra firma un acuerdo di trabao cu presidente di Canada Sr. Kevin Quin. Final di April pa ta exacto dia 26 di April, Canada lo manda su number one coach di seleccion y tambe nan number one pitcher instructor na Aruba pa asina duna un les un siman largo na nos coaches, pitching coaches y atletanan den un programa varia. Canada lo core cu tur gastonan y Aruba lo percura solamente

pa hospedahe. Meta di e programa aki ta pa entrena nos entrenadornan riba un nivel haltu con Canada ta prepara nan seleccion y asina yega na un trabao structura pa sigui desaroya softball di Aruba pa un nivel mas competitivo. Na final di Mei Aruba lo escohe (1) coach y esaki lo por bay 8 dia Canada pa sigui un training avanza. Canada lo paga esaki 100% y hasta e ticket pa e coach lo wordo cubri. Paisnan grandi y desaroya ta contruibi na paisnan cu tin problema primordialmente financieramente aportando pa desaroya nan nivel. Separa di esaki Aruba a intermedia cu Executive Director di softball di Australia Sr. Chet Grey y aki a logra otro acuerdo hunto cu dirigentenan di Colombia unda Australia lo hasi mescos y lo manda 2 coach pa Colombia pa 30 dia den luna di september pa yuda desaroyo di softball. Paisnan den región mas cu claro Aruba tambe por probacha di esaki pa manda 1 of 2 persona cu tur cos paga pa gobierno Colombiano. Aruba Softball Bond ta masha contento y orguyoso cu e logronan aki mirando con otro paisnan ta comprende nesesidadnan di otro cu tin menos recurso y ta brinda un aporte substancial.